



DET KONGELIGE FORNYINGS-
OG ADMINISTRASJONSDEPARTEMENT

Konkurransetilsynet
Postboks 439 Sentrum
5805 BERGEN

Dykkar referanse

Vår referanse
200700272

Dato
16. februar 2007

STATSBUDSJETTET 2007 - TILDELINGSBREV

Det vises til Stortingsbehandling av St.prp. nr. 1 (2006–2007) jf. Budsjettinnst. S. nr. 8 (2006–2007). Med bakgrunn i dette vert dei økonomiske rammene for Konkurransetilsynet sitt arbeid i 2007 tildelte. I det følgjande nemner departementet dei prioriteringane og resultatmåla tilsynet skal leggje til grunn, og dei krava til rapportering departementet har sett for arbeidet til tilsynet i 2007.

1. BUDSJETT OG FULLMAKTER

1.1 Budsjettrammer

Utgifter:

Konkurransetilsynet er tildelt **kr 83 112 000** fordelt på følgjande kapittel og postar i 2007:

KAP. 1550 Konkurransetilsynet

Post	Nemning	(i 1000 kr) Budsjett 2007
01	Driftsutgifter	78 112
23	Klagenemnda for offentlige anskaffelser (KOFA)	5 000
Sum kap. 1550		83 112

Inntening

Det blir føresett at **Konkurransetilsynet** har ei inntening på **kr 193 000** fordelt på følgjande kapittel og postar i 2007:

KAP. 4550 Konkurransetilsynet

		<i>(i 1000 kr)</i>
Post	Nemning	Budsjett 2007
02	Ymse inntekter	193
Sum kap. 4550		193

Inntektene er knytte til innbetaling av gebyr for handsaming av klagesaker etter regelverket for offentlege innkjøp i Klagenemnda for offentlige anskaffelser (KOFA).

1.2. Føresetnader for løyvingane

Generelt

Dersom det i løpet av året oppstår uventa utgifter på post 01 Driftsutgifter eller post 23 Klagenemnda for offentlige anskaffelser, skal desse normalt dekkjast ved omdisponeringar innafor den ramma som er gjeve. Om det ikkje er mogleg, skal det takast opp anten om våren i revidert budsjett eller om hausten i nysalderinga av statsbudsjettet. Forslaga til justeringar skal innehalde:

- Grunngeving av forslaget om inntekts-/utgiftsændring.
- Klargjering av dei viktigaste føresetnadene og usikre moment knytte til løyvingsforslaget.
- Utgreiing om kva tiltak som er gjennomførte for å avgrense utgiftsauken/inntektsreduksjonen.

Post 23 Klagenemnda for offentlige anskaffelser:

Løyvinga på post 23 Klagenemnda for offentlige anskaffelser er øyremerkd sekretariatsarbeid for klagenemnda og godtgjersle til medlemmer av nemnda. Punkt 2.1 gjev nærare omtale av mål og resultatkrav knytte til sekretariatsarbeidet."

1.3 Fullmakter

Som vedlegg til dette tildelingsbrevet følgjer ei oversikt over dei økonomiske og administrative fullmaktene som er delegerte frå Fornyings- og administrasjonsdepartementet til Konkurransetilsynet i 2007.

2. MÅL OG RESULTATKRAV

2.1 Særskilde utfordringar og satsingsområde

Regjeringa vil føre ein konkurransepolitikk som hindrar misbruk av marknadsmakt og monopoldanning. Konkurranse er eit viktig verkemiddel for å nå målet om effektiv ressursbruk. Dette gjer sitt til at forbrukarane får rimelege varer og tenester av god kvalitet, konkurranseevna til næringslivet blir styrkt og grunnlaget for det offentleges evne til å yte velferd aukar.

Konkurransetilsynet skal handheve konkurranselovgevinga for å få til velfungerande konkurranse mellom føretak. Sentrale verkemiddel er konkurranselova sine forbod mot

konkurransesavgrensande avtaler og utilbørleg utnytting av dominerande stilling, og inngrep mot føretakssamanslutningar som avgrensar konkurransen.

Marknadsløysingar har mange gode eigenskapar og skal framleis vere hovudregelen i den norske økonomien. Det er difor naudsynt med ei streng konkurranselov og eit aktivt tilsyn med konkurransen. Konkurransetilsynet skal mellom anna peike på konkurranseskadelege verknader av offentlege reguleringar og fremje forslag til tiltak for å bøte på skadelege verknader. Regelverket for offentlege anskaffingar skal stimulere til konkurranse og leggje til rette for nyetableringar.

Den mynde som dei ulike reglane i konkurranselova gjev Konkurransetilsynet, skal utnyttast fullt ut for å motverke konkurranseskadeleg verksemd.

Regjeringa meiner samstundes at marknaden ikkje alltid er eit effektivt verkemiddel for å nå viktige samfunns mål. Regjeringa ynskjer ikkje ei kommersialisering av viktige velferdsområde som utdanning, helse og omsorg.

Desse fire arbeidsområda vil vere dei viktigaste for det arbeidet Konkurransetilsynet skal gjere i 2007:

- Handhevinga av konkurranselova med tilhøyrande forskrifter og oppfølging av EØS konkurranselova
- Synleggjere resultatene av Konkurransetilsynets arbeid
- Følgje opp intensjonen med flyttinga av Konkurransetilsynet til Bergen
- Sekretariatsarbeidet for Klagenemnda for offentlige anskaffelser

Konkurranselova

Myndigheitsutøvinga knytt til ei forbodsbasert lovgjeving set store krav til Konkurransetilsynet. Konkurransetilsynet må syte for oppbygging av ein organisasjon som fyller dei krava handhevinga av lova fører med seg. Konkurransetilsynet har tilsett mange nye medarbeidarar, og må særleg leggje vekt på å få gjennomført naudsynte opplæringstiltak som tryggjer ein god forvaltningsmessig og konkurransefagleg kompetanse i organisasjonen.

Konkurransen i lokale marknader skal følgjast opp. Dette er i samsvar med § 1 i lova som fastset at det ved bruk av lova særleg skal takast omsyn til forbrukarane sine interesser. Konkurranselova § 9 fastset at Konkurransetilsynet skal føre tilsyn med konkurransen i dei ulike marknadene gjennom m.a. å peike på konkurranseregulerande verknader av offentlege tiltak. Konkurransetilsynet må tilpasse ressursbruken sin slik at desse krava blir følgde opp, jf. faglege mål og resultatkrav i punkt 2.2.1, og dei krava som følgjer av meldeplikta for føretakssamanslutningar.

Resultatmåling og evalueringar:

Departementet vidarefører prosjektet for etatsstyring i 2007. Konkurransetilsynet vil verte trekt aktivt med i det vidare arbeidet med å utvikle styringsdialogen med departementet, mellom anna gjennom arbeidet med å fastsetje nyttige resultatindikatorar.

Eit hovudmål for prosjektet er økt synleggjering av tilsynet sitt arbeid gjennom resultatrapporteringa. Konkurransetilsynet skal tilpasse resultatrapporteringa for 2007 til auka merksemd knytt til forvaltningsrevisjon. Konkurransetilsynet skal nyttiggjere seg sitt eige

arbeid med utvikling av formålstenlege interne rutinar for resultatevaluering slik at resultata av tilsynet sitt arbeid vert synleggjort i rapporteringa til departementet. Resultatmålingane og evalueringane skal vere knytte til tilsynet si ressursdisponering, faglege prioritering og verksemdsplanlegging.

Etableringa av Konkurransetilsynet i Bergen

Eit mål med flyttinga av Konkurransetilsynet til Bergen var etablering av ein etat med høg og stabil kompetanse i eit miljø med god rekruttering. I den vidare oppbygginga av Konkurransetilsynet sin organisasjon i Bergen, må tilsynet leggje forholda til rette for oppbygging av ein organisasjon i tråd med målet for flyttinga. I samband med etatsstyringsmøta og resultatrapporteringa skal Konkurransetilsynet halde departementet orientert om rekrutteringsforholda i Bergen og kva tiltak som er sette i gang for å tiltrekke seg og behalde medarbeidarar med høveleg kompetanse.

Klagenemnda for offentlige anskaffelser

Departementet skal slutføre evalueringa av KOFA i 2007. Konkurransetilsynet skal setje av ressursar til oppfølging av evalueringa.

Løyvinga på post 23 KOFA er auka for å styrkje bemanninga ved sekretariatet med sikte på å korte ned sakshandsamingstida og redusere opparbeidde restansar. KOFA må vere administrativt og kompetansemessig tilpassa oppgåvene sine, medrekna innføringa av sanksjonskompetanse for ulovlege direkte innkjøp. Konkurransetilsynet skal leggje til rette for kontinuitet i sekretariatet sitt arbeid med saker for nemnda og redusert sakshandsamingstid og restansar innan utgangen av 2007.

Departementet har skilt ut arbeidet knytt til KOFA i ein eigen budsjettpost og Konkurransetilsynet har budsjettansvaret for løyvinga på post 23 KOFA. Tilsynet må i samråd med leiaren av nemnda etablere ordningar som sikrar budsjettmessig kontroll i høve til løyvinga. Rapporteringa frå Konkurransetilsynet må leggje vekt på å synleggjere resultata av redusert sakshandsamingstid i sekretariatet for KOFA.

2.2 Faglege mål og resultatkrav

2.2.1 Effektiv handheving av forbodsføresegnene i konkurranselova.

Konkurransetilsynet skal sørge for at konkurranselova og EØS-konkurranselova vert handheva effektivt. Konkurransetilsynet skal:

1. Ved kontrollar avdekkje og fjerne ulovlege og skadelege konkurranseavgrensingar.
2. Prioritere handhevinga retta mot grove brot på forbodsføresegnene, m.a. med sikte på at handhevinga skal få ein generell preventiv verknad.
3. Leggje vekt på forbrukaraspekta i konkurranselova gjennom m.a. å setje fokus på lokale marknader.
4. Setje av ressursar til å evaluere og kontrollere at vedtak vert etterlevde.
5. Bruke lemping av gebyr- og bøtenivå for bedrifter som hjelper konkurransestyresmaktene på ein måte som fører til at brot på forboda vert avdekte.
6. Avsetje ressursar til å følgje opp marknader som blir kjenneteikna av større marknadsendringar.
7. Rettleiingsplikta skal oppfyllest slik at dei næringsdrivande kan innrette seg etter lova.

8. Saman med departementet i det vidare arbeidet med etatsstyringsprosjektet utarbeide retningslinjer og naudsynt rutinar for det internasjonale arbeidet med sikte på å klargjere mandat, ansvar og oppgåver for tilsynet.
9. Prioritere EØS-enkelt saker som gjeld norske forbrukarar eller bedrifter, prinsipielle saker, og saker der andre interesser enn konkurransepolitiske interesser står sentralt. I slike saker skal Konkurransetilsynet orientere departementet.

2.2.2 Effektivt tilsyn etter føresegnene i konkurranselova om føretakssamanslutningar
Konkurranselova fastset at Konkurransetilsynet skal gripe inn mot ei føretakssamanslutning dersom tilsynet finn at samanslutninga vil føre til eller forsterke ei vesentleg avgrensing av konkurransen i strid med formåla i lova.

Konkurranseetilsynet skal ha naudsynt fagleg og administrativ merksemd knytt til behandlinga av føretakssamanslutningar, og leggje til rette for å minimere sakshandsamingskostnadene for involverte paratar.

2.2.3 Etterspurnadssida i marknadene skal fungere effektivt

Dersom det trengst for å fremje konkurransen, skal Konkurransetilsynet fastsetje pålegg om prisinformasjon. Arbeidet skal koordinerast med Forbrukarombodet som er ansvarleg for tilsynet med prismerkingføresegnene.

2.2.4 Tilstrekkeleg vekt på konkurranseomsyn på andre politikkområde

Konkurranseetilsynet skal medverke til at offentlege reguleringar eller tiltak vert utforma slik at dei måla med reguleringane vert tekne vare på samstundes som uheldige verknader på konkurransen vert minst mogleg. Vidare skal Konkurransetilsynet medverke til at det ikkje skjer uheldige konkurransevridingar i marknader der offentlig verksemd konkurrerer med privat verksemd.

2.2.5 Ei verksemd som fremjar formåleffektivitet, ressurseffektivitet og forbrukarorientering.

1. Konkurransetilsynet skal hjelpe departementet i vidareutvikling av etatsstyringa, m.a. ved å delta i "prosjekt for etatsstyring" med sikte på å utarbeide resultatindikatorar for å synleggjere resultatata av arbeidet og prioriteringane i tilsynet.
2. Konkurransetilsynet skal vidareutvikle den interne sakshandsaminga si med vekt på at den skal nytte ressursane effektiv og vere brukarvenleg.
3. Konkurransetilsynet skal til kvar tid vurdere om det trengst særlege informasjonstiltak om konkurranselova.
4. Konkurransetilsynet skal vidareføre arbeidet med utvikling av elektroniske sakshandsamingsløysingar for å betre servicen og lette kontakten for eksterne brukarar. Konkurransetilsynet skal følgje opp arbeidet sitt med brukarundersøkingar med sikte på å betre brukarane sitt kjennskap til og sine vurderingar av det arbeidet tilsynet gjer.

5. I sakshandsaminga knytt til budsjettprosessar og andre administrative oppgåver i høve til departementet skal Konkurransetilsynet ha rutinar for å svare innan dei fristane som er sett, og utveksle informasjon som sikrar god kommunikasjon.
6. Konkurransetilsynet skal vurdere korleis satsinga på bruk av EFQM Excellence verktøyet for kvalitetssikring og intern evaluering skal nyttast i synleggjeringa av resultatane av Konkurransetilsynets arbeid. Konkurransetilsynet skal rapportere om bruk og framdrift for dette arbeidet i samband med halvårsrapporteringa.

2.2.6 Særskilde bransjar

1. Konkurransetilsynet skal prioritere ressursar til å assistere departementet i oppfølginga av konkurransetilhøva innafor utvalde marknader. Det gjeld mellom anna ein gjennomgang av helsesektoren på bakgrunn av Soria Maria-erklæringa der det heiter at Regjeringa vil styrke det offentleges ansvar og rolle og motarbeide kommersialisering innafor dei sentrale velferdsoppgåvene som helse, omsorg og utdanning.
2. Konkurransetilsynet sitt inngrep mot opptening av bonuspoeng på SAS Braathens innanlandsruter går ut 1. august 2007. Utløpet av dette vedtaket må ikkje ta frå forbrukarar og næringsliv dei gevinstane som den auka konkurransen har ført med seg i form av lågare priser og betre rutetilbod. Konkurransetilsynet skal gjennomføre naudsynte tiltak for å oppretthalde og styrke konkurranse i norsk luftfart.
3. Konkurransetilsynet skal setje av ressursar til å assistere departementet i arbeidet med evaluering av verknadene av unntaksreglane for bokbransjen.
4. Konkurransetilsynet skal vere førebudd på å kunne følgje opp konkurransetilhøva i meierisektoren i høve til eventuelle endringar i sektorreguleringane som måtte følgje av det pågåande arbeidet med utvikling av marknadsordninga for mjølk.
5. Konkurransetilsynet skal prioritere oppfølging og gjennomgang av konkurranseforhold i marknadene for programvarer.

2.3. Ethiske retningslinjer

Konkurransetilsynet skal sjå til at dei etiske retningslinjene for statstenester er kjende i heile organisasjonen, og at dei vert etterlevd på alle nivå slik at Konkurransetilsynet sin integritet kan tryggast.

3. FELLES FØRINGAR FOR ETATAR UNDER FAD

3.1 IKT-området

Konkurransetilsynet skal nytte dei internasjonale WAI-kriteria slik dei kjem fram i Noreg.no sine kvalitetskrav til nettstader, ved utvikling eller omfattande vidareutvikling av sine eksterne og interne nettstader. Konkurransetilsynet bør:

- gjere relevante elektroniske tenester tilgjengelege i næringslivsportalen Altinn (jf. altinn.no) og i innbyggjarportalen Miside (Noreg.no) etter lanseringa.

- følge tilrådingar frå Regjeringa om bruk av IKT-standardar i offentleg forvaltning. Retningsliner om dette vil vere samla i ein referansekatalog, som vert bygt opp på nettsida til FAD odin.dep.no/fad
- vurdere bruk av programvare basert på open kjeldekode. Departementet har som mål å opprette eit kompetansmiljø for open kjeldekode som skal fungere som ein nøkkelressurs for offentlege verksemdar.

3.2 Grøn stat

Miljøleiing er eit verkty for å auke medvitet om miljøkonsekvensane av ei verksemd og setje i gang eit systematisk arbeid for å endre verksemda i ei miljøvenleg retning. Innføring av miljøleiing er ein dynamisk og kontinuerleg prosess. Det skal gjerast ein årleg revisjon av miljøleiingsarbeidet der det vert lagt til rette for kontinuerlege forbetringar, jf. rettleiaren T-1426 *Miljøledelse i staten* frå Miljøverndepartementet. På www.gronnstat.no er det samla rettleiingar, verkty og relevante eksempel i samband med innføringa av miljøleiing.

3.3 Likestilling – aktivitetsplikta

Konkurransetilsynet skal arbeide aktivt, målretta og planmessig for å fremje likestilling både som arbeidsgjevar og som representant for styremaktene, jf. likestillingslova § 1.

Konkurransetilsynet skal gjere ei vurdering av ”kjønnsbalansen” internt i organisasjonen på ulike nivå, gje ei oppsummering av status og gjere greie for planlagde tiltak i årsrapporten.

3.4 Rekruttering av innvandrarar

Regjeringa har bestemt at i 2007 skal alle statlege verksemdar setje mål og utarbeide planar for å auke rekrutteringa av personar med innvandrarbakgrunn. Slike mål og planar kan t.d. inngå i verksemds- og/eller personalplanar. Det skal rapporterast om måloppnåing i årsrapporten. Dette inngår som eitt av tiltaka i handlingsplanen for integrering og inkludering som regjeringa la fram i statsbudsjettet for 2007. I årsrapporten for 2007 skal det på denne bakgrunnen rapporterast om:

- Talet på tilsette (og prosentdel) (faste og mellombels stillingar) med innvandrarbakgrunn i verksemda den 1.1.2007.
- Kva mål verksemda sette for rekruttering av personar med innvandrarbakgrunn i 2007.
- Tal og prosentdel tilsette med innvandrarbakgrunn den 1.1.2008.

Integrerings- og mangfaldsdirektoratet (IMDi) www.imdi.no gjev råd og rettleiing til statlege verksemdar i arbeidet med å rekruttere fleire innvandrarar. Verksemdene kan ta kontakt med IMDi for råd og rettleiing i arbeidet, m.a. for ferdig utarbeidd skjema for å kartleggje tal på tilsette med innvandrarbakgrunn.

3.5 Rekruttering av lærlingar

Konkurransetilsynet skal vurdere auka rekruttering av lærlingar, til dømes innafor kontorfaget og IKT- servicefaget.

3.6 Tiltak for inkluderande arbeidsliv

Konkurransetilsynet skal sette i verk tiltak som sikrar mogleg integrering av personar med redusert funksjonsevne og at eldre arbeidstakarar vert verande lengre i jobb.

3.7 Sjukefråvær.

Konkurransetilsynet skal setje i verk tiltak som held sjukefråveret innafor dei måla som er sett for statleg verksemd. Konkurransetilsynet skal i samband med årsrapporten for 2007 gjere greie for sjukefråveret og for tiltaka som er teke i bruk for å redusere sjukefråveret dersom måla ikkje er oppnådde.

4. RAPPORTERING I 2007

4.1 Utarbeiding av årsrapport for og rapportering gjennom året 2007

Konkurransetilsynet skal rapportere skriftleg om arbeidet to gonger i året. Utgangspunktet for tilsynet si rapportering er økonomireglementet for staten §§ 9 og 11 og føresegnene i punkt 1–5. Halvårsrapporten skal vere departementet i hende innan 22. august 2007. Tilsynet sin frist for levering av årsrapporten til departementet er 15. februar 2008. Årsrapporten skal og sendast Riksrevisjonen i elektronisk form innan denne fristen. Det skal rapporterast særskilt om bruk av midlane på post 23 KOFA.

Innan 1. mai 2007 skal Konkurransetilsynet utarbeide ein risiko og vesentlighetsvurdering for sine aktivitetar for 2007, jf. § 4 i reglementet for økonomistyring i staten. Denne vurderinga skal ta utgangspunkt i dei måla og prioriteringane som er fastsette i tildelingsbrevet og måla i tilsynet sine eigne strategidokument og verksemdplanlegging for 2007. Departementet viser her til rettleiaren "Risikostyring i staten" som er utarbeidd av senter Senter for Stalig Økonomistyring (SSØ) og til Riksrevisjonens gjennomgang av etatanes risiko- og vesentlighetsvurderingar i sin forvaltningsrevisjon.

I halvårsrapporten for 2007 skal tilsynet rapportere om eventuelle avvik frå måloppnåing. Konkurransetilsynet skal her orientere om tiltak som er sett i gong for å rette opp eventuelle avvik. Vidare skal Konkurransetilsynet rapportere korleis EFQM Excellence er teke i bruk for å synleggjere verknadene og resultatata av Konkurransetilsynet sitt arbeid.

I årsrapporten skal Konkurransetilsynet leggje vekt på evalueringar av verknader og måloppnåing framfor reine aktivitetsskildringar. Evalueringane skal gjerast gjennom analysar som synleggjer resultatata av aktivitetane og prioriteringane. Konkurransetilsynet skal m.a. synleggjere ressursbruken på dei ulike påboda i konkurranselova og i samband med dette gje ei vurdering av dei prioriteringane som ligg til grunn for denne fordelinga.

Dersom det ligg til rette for det, skal Konkurransetilsynet ta i bruk resultatindikatorar i synleggjeringa av resultatata av Konkurransetilsynet sitt arbeid, jf. det pågåande arbeidet i etatstyringsprosjektet som Konkurransetilsynet deltek i.

4.2 Økonomirapporteringa

Konkurransetilsynet skal utarbeide økonomirapportar per 1. april 2007, per 1. september 2007 og per 1. desember 2007. Rapportane skal utarbeidast etter følgjande mal:

- Disponibel løyving (tildelte midlar + ev. overføringar)
- Eventuelle omdisponeringar, jf. dei fullmaktene verksemda har
- Rekneskap per dato
- Samla venta forbruk i 2007

For post 01 og post 23 bør det gjerast greie for dei viktigaste føresetnadene og eventuell uvisse som ligg til grunn for utrekning av forbruk/inntekt. Større avvik skal forklarast, jf. og punkt 1.2. over.


I tråd med etablert praksis vil departementet i 2007 halde 3 etatstyringsmøte med Konkurransetilsynet. I samband med innkalling til møta, vil utkast til sakliste verte sendt tilsynet for merknader. Økonomirapportering vil inngå i saklista.

Fast rapportering til statsrekneskapen skal skje i tråd med retningslinene frå Finansdepartementet, jf. rundskriv R-10/2006 som ligg ved.

5. AVSLUTNING

I samsvar med § 7 i økonomireglementet og føringane som er gjevne i dette tildelingsbrevet vert dei nemnde løyvingane på kapittel 1550 stilte til disposisjon for Konkurransetilsynet i 2007.

Med helsing


Heidi Grande Røys
statsråd

Vedlegg:

1. Økonomiske og administrative fullmakter for 2007
2. Rundskriv R-10/2006

Kopi med vedlegg:

1. Riksrevisjonen

Vedlegg til tildelingsbrev 2007 – Konkurransetilsynet

Økonomiske og administrative fullmakter

1. Fullmakt til å overskride driftsløyvinga mot tilsvarande meirinntekt

Fullmakta gjeld høve til å overskride driftsløyvinga på kap. 1550, post 01 med inntil to prosent av løyvinga på posten mot tilsvarande meirinntekt på kap. 4550 post 01, og gjeld høve til å overskride driftsløyvinga på kap. 1550 post 23 med inntil to prosent av løyvinga på posten mot tilsvarande meirinntekt på kap. 4550 post 02, jf. Løyvingsreglementet § 11 fjerde led nr. 1 og Finansdepartementets rundskriv R-110, punkt 2.4.

Den inntektsfinansierte aktiviteten må liggje innafor det som er verksemda sine mål, oppgåver og rammevilkår, og ikkje skape bindingar til å oppretthalde eit høgare aktivitetsnivå enn det som vert dekt av utgiftsløyvinga dersom meirinntekta fell bort.

Meirinntekter i form av lønnsrefusjonar frå andre statlege verksemdar, jf. inntektspostane 15–18, gjev grunnlag for overskriding utan særskilt samtykke, og utan å vere bunden av gjevne avgrensingar.

2. Fullmakt til nettobudsjettering ved utskifting av utstyr

Fullmakta gjeld høve til nettobudsjettering ved utskifting av utstyr løyvd over kap. 1550, post 01 med inntil fem prosent av løyvinga, når dette er ein del av ein rutinemessig fornyingsprosess, jf. § 3 fjerde legg i løyvingsreglementet og rundskriv R-10 frå Finansdepartementet. Punkt 2.2. Salainntektene skal førast til kredit på underpost 01-21, slik at det er mogleg å kontrollere at grensa på fem prosent ikkje vert overskriden.

3. Fullmakt til å inngå leigeavtaler og avtaler om kjøp av tenester utover budsjettåret

Fullmakta gjeld høve til å inngå leigeavtaler og avtaler om kjøp av tenester utover budsjettåret 2007, som gjeld den ordinære verksemda i Konkurransetilsynet, jf. § 6 andre ledd i løyvingsreglementet og rundskriv R-10 frå Finansdepartementet, punkt 2.3. Dei utgiftene ein har hatt i samband med avtala må kunne dekkjast innafor eit uendra løyvingsnivå på den aktuelle budsjettposten i heile avtaleperioden, og oppseiingsklausular skal om det trengst innarbeidast i avtala.

4. Fullmakt til å overskride driftsløyvingar til investeringsføremål tilsvarande innsparing i dei tre følgjande budsjettåra

Fullmakta gjeld høve til å overskride inntil fem prosent av driftsløyvingar på kap. 1550, post 01 mot tilsvarande innsparing i dei tre følgjande budsjettåra, jf. Løyvingsreglementet § 11 fjerde ledd nr. 3 og rundskriv R 110- frå Finansdepartementet, punkt 2.6. Overskridinga må nyttast til investeringsføremål som innkjøp av utstyr eller bygningsmessig arbeid. Innsparinga må utgjere minst ein tredel av overskridinga ved utgangen i første påføljande og minst to tredelar av overskridinga ved utgangen av andre budsjettår.

5. Fullmakt til å yte erstatning for skade/tap av private eigedelar

Fullmakta gjeld rett til å yte erstatning for inntil 20 000 kroner dekt innafor verksemda sitt eige budsjett for skade eller tap av private eigedelar i samband med tenesta ved tjuveri,

innbrot, naturskade, brann o.l. Erstatninga må gjevast i samsvar med retningslinene i personellhandboka.

6. Fullmakt til å gje løyve til utdanningspermisjon med løn i inntil eitt år

Fullmakta gjeld rett til å avgjere kven i verksemda som skal få utdanningspermisjon med løn i inntil eitt år innafor verksemda sitt eige budsjett. Løyvet må gjevast i samsvar med retningslinene i personellhandboka.

7. Fullmakt til å ta opp saker etter konkurranselover § 9 bokstav e) direkte med andre departement

Fullmakta gjeld rett til å ta opp saker som gjeld konkurranseskadelege verknader av offentlege reguleringar/verksemdar direkte med det aktuelle departementet, dvs utan å sende saken gjennom Fornyings- og administrasjonsdepartementet. Ordninga er knytt til konkurranselover § 9 bokstav e).